

43-45

东坡集卷

四四四

五四三

東坡先生全集卷之四十三

內制批荅

賜正議大夫同知樞密院事安燾乞外郡不

許批荅二首

元祐元年
十月八日

覽表具之卿以應務之才居本兵之地綏靜中外
人無間言何疑上章欲求去位未喻厥意聞之慙
然夫榮親莫大於功名養志不專於甘旨而况魏
闕之下父母之邦退食問安孰便於此勉循其舊
以卒輔弼

二

元祐元年
十月八日

省表具之夫事親者不擇地而安之孝之至也而况艱難之際一日萬幾冰淵之懼當務同濟卿練達兵要灼知邊情寄託之深義難引去亟求自便朕何賴焉

賜新除中大夫守尚書右丞劉摯辭恩命不

許斷來章批荅二首

元祐二年十一月

覽表具之道有行藏時有用捨歲不我與難以智求道之將行豈容力避大言大利固當安而受之小行小廉非所望於卿者成命不再可無復辭

元祐二年十一月

省表具之政如農耕以既穫爲能事言如藥石
愈疾爲成功若耕不穫疾不愈朕何望焉所以用
卿者非以富貴卿也勉卒成業何以辭爲

賜太師文彥博乞致仕不許批荅二首

元祐二年

三月二十九日

卿出入四世師表萬民無羨於功名而有厭於富
貴其所以忘身徇國捨逸就勞者豈有求而然哉
凡以先帝之恩生民之故也卿之在朝如玉在山
如珠在淵光景不陳而草木自遂去就之際損益
非輕昔西伯善養老而太公自至魯穆公無人子

思之側而長者去之卿自爲謀則善矣獨不爲朝廷惜乎藥餌有間時遊廟堂家居之樂何以異此

二月
元祐二年三月二十六日

朕修身以承六聖虛已以聽四輔而法度未定陰陽未和民未樂生吏未稱職中夜以思方食而歎雖不敢以事諉元老實望其以身率百官卿猶未卽於安孰敢不盡其力此聖母冲人之本意而天下有識之所望也昔唐太宗以干戈之事尚能起李靖於旣老而穆宗文宗以燕安之際不能用裴度於未病治亂之效於斯可見朕意如此卿其少

安

賜宰相呂公著乞退不許批荅

元祐二年三月二十九日

卿才全而德備積厚而施博明亮篤誠坐屈群策
既以天下公議而用於此矣豈以卿之私意而聽
其去哉水旱之災不德所召卿當助我求所以消
復之道不當求去我也詩不云乎大夫君子昭假
無羸大命近止無棄爾成勉思厥職以荅民望

賜宰相呂公著乞退不允批荅

元祐二年三月二十九日

用賢之功必要之久遠日計不足歲計有餘朕之
用卿期於百姓之既富卿之自信亦豈一日而成

功常賜之災天以警朕夙夜祗懼與卿同之朕若
歸過於股肱何以荅天戒卿若釋政而安逸何以
塞民言各思其憂少安厥位

賜尚書左丞李清臣乞退不允批荅二首

元祐

二年四月十八日

卿以方聞之舉擢自厚陵禁林之選用於神考逮
受顧命弼予冲人義旣同於戚休身豈輕於出處
遽欲引去聞之惻然姑安厥常以助予治

二年四月十八日

祥除之初念我聖祖所與共政不忘舊人而興傳

學多聞通練古今小心畏慎不見過失力求引去
爲之惴然勉畱輔弼益祇服

賜文武百寮文彥博以下上第一表請皇帝

御正殿復常膳不允批荅

元祐二年四月二十二日

朕卽位二年水旱繼作致災之故實惟冲人旣延
及於無辜復貽憂於文母是以坐不安席食不甘
味實欲深念厥咎豈徒見之空言而雨不崇朝農
猶告病欲徇來請惕然未寧其一乃心勉正厥事
毋重朕之不德以荅天之深戒

賜文武百寮文彥博已下上第一表請太皇

太后復常膳不許批荅

元祐二年四月二十二日

旱暵之罰自冬及夏天之降災如此其久則夫致災之道豈一日而然哉雖力行罪已之文尚恐非應天之實而卿等以膚寸之澤遽欲卽安覽之惕然未敢自赦其文修不逮務盡厥誠期茲歲於有秋雖復常其未晚

賜文武百寮文彥博已下上第五表請皇帝

御正殿復常膳允批荅

元祐二年五月二十二日

朕以寡昧膺受多福常欲損上益下畏天之威矧茲旱災咎在不德而卿等以雨澤旣至封章屢上

其從其意甚媿於中夫天之有風雨雷霆猶朕之
有號令賞罰朕不修明其事何以責應於天永思
其終無忘納誨

賜文武百寮文彥博已下上第五表請太皇

太后復常膳許批荅

元祐二年五月二十九日

德積無素民罹其災精誠莫通禱不時應雖蒙膏
澤之報僅救焦枯之餘勉徇來章猶虞後患其謹
視盜賊勸卹流亡益務交脩以裨不逮

賜文武百寮太師文彥博已下上第一表請

舉變不計批荅二首

元祐二年六月一日

先王之禮樂因情而立文君子之哀樂自中而形
外夫有莫大之戚則有無窮之悲先皇帝天覆四
方子養萬物至今窮髮之表尚餘流涕之民而况
宮庭之間母子之愛僅畢三年之制遂講八音之
和所未忍聞非不欲作卿等謹於率禮篤於愛君
徒欲亟舉舊章顧未深明吾意三復太息難於
從

二
元祐二年
六月一日

禮之至者無文哀之深者無節故禪而不樂古人
非以求名琴不成聲君子以爲知禮朕以宗廟之

重勉蹈先帝之命履其位惕然而自驚用其物潛
焉而出涕未報昊天罔極之德常懷終身不忘之
憂欲從衆言亟舉備樂而金石絲竹乃悽耳之聲
干戚羽旄皆眩目之具哀旣未泯樂何從生再閱
來章徒增感慕

賜文武百寮太師文彥博已下上第二表請

舉樂不許批荅二首

元祐二年
六月四日

追密之制雖盡於三年追懷之私豈論於歲月金
石在御惻然未寧吾不以一身之憂廢天下之樂
今施之郊廟用之軍旅州閭之會絃歌相聞獨盡

餘哀止於中禁以爲於義未害是故行之不疑

二
元祐二年六月四日

朕少遭閔凶僅畢祥禪雖俛就企及非以過制爲賢而創巨痛深不能以禮自克觀過其黨聖人許之禮曰喪三年以爲極亡則弗之忘矣誠重違國老之忠告姑欲盡人子之至情

賜太師文彥博等請太皇太后受冊第二表

不許批荅

元祐二年六月四日

吾聞聖人以天下爲憂未聞以位號爲樂也損已裕物畏天檢身此吾平日之本心非獨遇災而一

發也孔子曰以約失之者鮮矣卿等以是輔我顧不美哉

賜文武百寮太師文彥博已下上第四表詩

舉樂不許批荅二首

元祐二年六月九日

吾之本性以清淨寂寞爲樂雖在平日無游觀聲技之念矧艱難之後哀疚之餘中夜以興方食而歎將不堪其憂者豈有意於樂哉雖欲勉從未能自克忠告屢却愧歎兼深

二

元祐二年六月九日

鐘鼓以導和羽籥以飾喜譬之飲食之節適於口

體之宜今衰麻之除莫敢逾制而琴瑟之御則有
未安卿等忠誠確然開喻至矣惟反求諸心而弗
得故欲行其言而未能推之人情當識朕意

賜太師文彥博等上第三表請太皇太后受

冊許批荅

元祐二年
六月九日

吾上順帝則下酌民言處以無心期於寡過卿等
以爲協氣旣應羣謀僉同若固違典禮之常恐莫
慰大人之望遇災而懼昔者非以爲謙聞義則遷
吾亦豈敢自必勉從故事以副嘉言

賜新除中書侍郎知樞密院事右丞王存辭免恩命

元祐二年六月十二日
士有目定於廟堂蔽自朕志
言既穆朕志不移而用過謙之詞反已成
服乃事宜無復云

二元祐二年六月十一日

爲國不患於無人而不用之爲患事君非
於辭寵居寵而無媿之爲難吾之用卿計已審矣
卿之自信又何疑哉

賜新除知樞密院安燾辭免恩命不許斷來

章批荅二首

元祐二年六月二十四日

覽表具之論材考德聖人所以公天下難進易退
君子所以善一身權之以義孰爲輕重訓兵論將
威懷戎狄卿以是事上豈不賢於逡巡退避也哉

二元祐二年六月二十四日

覽表具之德稱其服臣主俱榮食浮於人上下交
病朕之爲天下慮甚於卿之自爲謀也思而後行
有出無反成命不再卿毋復辭

賜新除檢校太尉守司空依前開府儀同三
司致仕韓絳辭免恩命不允批荅二首

元祐二年